

宋詩鈔初集

宋

書

卷

四

集

道鄉詩鈔

鄒浩字志完常州晉陵人第進士爲太常博士哲宗擢爲右正言時廢孟后立賢妃劉氏浩切諫削官羈管新州徽宗立召還復官問諫草安在曰焚之矣退告陳瓘曰禍在此乎異日奸人妄出一緘則不可復辨也蔡京用事果爲僞疏陷之遂謫衡州尋竄昭州五年得歸復直龍圖閣病卒高宗贈寶文閣直學士賜謚忠嶺表歸後自闢小圃號曰道鄉故學者稱道鄉先生

秋蠅

秋風快如刀着木木欲折蕃鮮轉淒淒入眼無一悅青蠅獨何爲飛鳴猶未滅造化本無私爾生亦偶竊念方三伏中日車午停轍下照人世間何異紅爐熱動鳥倦戢翼憚

獸喘吐舌惟人於此時體解劇疲茶虛堂幸可逃枕簟隨
意設好睡邊韶同素懶嵇康埒更此值清涼酣寢謂須決
雙睫纔欲交汗膚遭爾齧營營不絕聲宛類讒口哢使我
寢不安欲息還復孳况如一簞貧未能萬錢歡園蔬薦脫
粟杯盤殊滅裂雙筋纔欲拈咀嚼遭爾餐適從何處來食
飲汗脩潔使我味不甘欲嚥還復噎毆除付疲兵祇足增
跛蹙宜哉孫權彈爲爾情激切期望秋風回一掃無餘孽
偶此延朝昏勿謂風不烈氣候侵凝凜龍蛇且藏穴爾形
大豆然豈能堅如鐵

再酬仲孺

龍團方啓封數子已驚視端如肖壁人騎羊入城肆又如
金谷姿不合樓前墜囊衣本酸寒茶具無一是紛紛詰鄰

家浪欲學擁鼻秋空輒雲雷秘惜乃天意未敢還巾車且
集諸生試豈非今年芽歲月與君異直須如印刴詩驛趼
來使念君才患多落筆有餘思盈編故可期河流幾時泚
君應嘲馬肝不食亦知味

次韻韓君表雪中感懷

龍衣不解顏憂民向來急天高委真符年豐兆原隰連山
水氣昏過雲鴈聲澁先春凌馬奔投隙作塵入瀕竹乍蕭
蕭驚風還汲汲頗輕花鬪狂宥共雨爭濕夜半回曉光木
杪森鵠立開編適吾心鼓枻輟清集一飽儻可償萬事非
所及想見秋稼前腰鎌荷青笠

仲益約遊延慶不至作此戲之

出門無他岐一徑指山麓餘寒弄晴陰浙瀝散輕玉我僕

亦賞心我馬亦飛肉回首幕中英文書正拘束

戲督潛亭作春羹

先生家中餘玉粒粉以爲餅陪春羹春羹品物謝時味江
流暖泛園中英晴窗對案忽舉首徑走長鬚呼友生襄陽
大夫腹如鼎一著九牛猶未盈懽然放筯卽過我自嘆珍
庖逾大烹且言初意亦在我屬我府事畱西城先生飯不
飯俗客若苦轉眄相倒傾東風雕刻物物好槎頭縮頸尾
不頰藥苗蔬甲破土出似與米齊爭功名應憐十載瘦藜
莧爲我一除饑腸鳴

潛亭旣見和再作此贈之

不作苟見如君平不以禮屈如樊英屢屢堅卧三十載凜
凜風聲人自傾牆東牆西過高馬往往愧汗面發頰豈知

嗜欲極豺虎白晝擇肉無厭盈有時一飯稔奇禍他年五
鼎還遭烹狡兔未滅黃犬在突兀上蔡空前城先生謝去
旣飽德鼓腹之趣終難名更要我輩集匙筯風雨不變如
雞鳴自憐頭額乏奇表幾與齏鹽同此生不愁捩手遂傾
覆只愁未至聞憂羨

嘲仲益

春時殖蘭甚勤比新東軒遂悉鋤去或者訊笑則曰予將易竹於此作此戲之

低簷蔭茅竹陋如野人居夫子莞爾笑曰此真吾廬庭前
鬱喬木庭後猶榛蕪芟削隨手淨春蘭殖扶疎光影動窗
几馨香襲文書皎然紉佩心邂逅同三閭爾來基構新百
事凌往初突兀煥華屋茅竹掃莫餘雙楠庭之珍斬伐殊
榮枯要知碧油幢特立當階除念念入勲業不與蓬華俱
蘭雖不生門安能追誅鋤剖琴如剖薪烹鶴如烹魚珠玉

抵飛鳥鏹鍾委洪爐逝矣覆轍存來車猶此涂尚欲取脩
竹永以娛朝晡問竹竹無言冷風一虛徐

別零陵

零陵距中邦道阻五千里我以放逐來本非心樂只身止
高山巔忽忽彌半襪人情久自親况復多可喜坐使故鄉
念如火沃之水罪大不得畱今茲動行李昭州雖嶺南流
寓蓋均耳儻未還庭闈在彼猶在此胡然當作離耿耿殊
不已物我要兼忘咄哉從此始

詠路

赤路如龍蛇不知幾千丈出沒山水間一下復一上伊予
獨何爲與之同俯仰

聞彥和過桂州

人臣難有已况復顧其家忘家以徇國致主爲勛華割愛
非不仁成功詎能加御史殿中傑指摘一作生疵瑕昔如
鵠矯雲今如兔罹置省符到房陵驅逐殊喧譁卽日出門
去形影自天涯羈凰攜衆雛驚散隨風沙渺漭失處所何
由書報嘉君心固已定聞者空傷嗟

大雨中接憲使因成小詩呈陽先生

霜風折木雨如傾斂板泥中廝役并遙想先生鼓琴罷觀
書正傍短燈檠

二月十五日朝拜建隆橋上偶作

單衣迎犯曉風清斗柄回南月尚明柳密行人看不見輪
蹄相屬但聞聲

湖上雜詠

通雅詩金
荷葉如錢三月時幅巾藜杖一追隨爾來勝事知多少惟
有風標公子知

杜牧之以白鷺爲風標公子

何處清風作晚涼解衣相與面滄浪青萍紫荇令人恨遮
却琉璃萬頃光

華亭標格本青雲邂逅西湖秋復春作意一聲君會否鵝
鸞集處是真人

疾病經旬厭藥杯喜君折簡傍湖來濃雲幾敗乃翁事賴
有南風爲約開

穰東驛壁間有詩因次其韻

筆轡驅馳長眼花更堪風雨作泥沙郵亭准擬一醉倒白
酒黃雞無處賒

早行

朝來由氣銳前程入馬蹄天形隨月見斗柄傍人低路轉
纔縈白沙平豈辨泥露零欺髣髴犬吠隔蒿藜恍惚南柯
夢參差逢氏迷比經十里堠始報一聲鷄似脫關中日如
趨圯下蹊脩真空有術習懶信無梯行李幾時北武當猶
在西誰知貴公子角枕正清閨

順陽東山下小池

用西伏牛亭謝公定韻

行盡江山知幾重山前池沼尚殘紅塵埃滿眼欣相見駐
馬垂楊夾岸風

將到均州

武當孤壘插天西一見都忘渴與饑倦客惟貪早休歇不
知匏繫未成歸

入試院呈同事章顯父推官及監試柴承之朝奉

漢江洶洶不知休江上譙門鼓角秋匹馬崎嶇隨國事同心邂逅得儒流何妨蟋蟀牀頭急况是芭蕉雨脚收別乘端容共蕭散從今相與傲浮丘

鄰家集射

牆東金鼓不停聲知是將軍奕世孫莫浪鳴弓向飛鴈一年一度到中原

雨中

五月沉陰久不開冷風吹雨滿天街老農且莫愁蠶麥丞相祈晴已宿齋

謝潛亨惠芸香紫桃

暑窗已覺書生蠹饑腹還驚雨後雷珍重先生解人意芸香桃實一時來

聞存之遊京師且邸報達官有薦之者

昨來不肖聽朝雞乞得真宮卽日歸老衲蒲團閑共倚少
師玉麈醉同揮誰知捷徑嵩山在未覺心馳魏闕非綠鴨
陂中釣竿手只應從此叩黃扉

存之曾有詩云從來釣竿手不解叩黃扉

仁老寄墨梅

前年謫向新州去嶺上寒梅正作花今日霜縑玩標格宛
然風外數枝斜

懷何伯震

我別家時君在牀後來南北兩相忘直饒伏枕到新歲也
勝投身居瘴鄉孤節未嘗交世俗清貧何以度星霜皇天
默相誰窺得看取他年吾道光

懷張晉卿

道猶詩金
年少東鄰新親家奮然鱗鬣脫泥沙傳聞昨者數時弊想
見邇來雙鬢華局上光陰聊鬪馬盃中意氣莫生蛇江鱸
已過河鮑出准擬從君烹荻芽

又得敷文書

一封黃勅下天關嶺表湖南釋舊跼吏部回頭真可笑拾
遺作伴竟同還張公洞裏花流水揚子江邊雪滿山更約
家居多暇日相從莫遣髩毛斑

送王裘仲侍親赴闕

置榻初相得膏車忽起行秋風無限事春酒不勝情原憲
何曾病丘明竟有聲從容湖上語它日看功成

淮海集鈔

秦觀字少游一字太虛揚州高郵人豪雋慷慨溢於文
詞舉進士不中盛氣好奇讀兵家書見蘇軾於徐爲黃
樓賦軾以爲有屈宋才介其詩於王安石亦謂清新如
鮑謝軾勉以應舉爲親養始登第筮仕元祐初軾以賢
良方正薦於朝除秘書正字兼國史院編脩官日有研
墨噐幣之賜紹聖初坐黨籍出判杭州以增損實錄貶
監處州酒稅使者承風旨伺過失無所得則以謁告寫
佛書爲罪削秩編管橫州徙雷州徽宗放還至藤州出
遊華光亭爲客道夢中長短句索水飲笑視水而卒朱
子謂渠詩合下得句便巧呂居仁云少游過嶺後詩嚴
重高古自成一家故當時於蘇門並稱秦晁晁以氣勝

則灝衍而新崛秦以韻勝則追琢而淳泓要其體格在
伯仲而晁爲雄大矣

泊吳興觀音院

金刹負城闌闐然美栖止卞山直穹窿茗水相依倚霜檜
鬱冥冥海棕鮮嶷嶷廣除庇夏陰飛棟明朝晷溪光鳬鷺
邊天色菰蒲裏緒風傳晝焚壁月窺夜禮洩雲羣層空規
荷鑑幽吐餘艸煙際下鍾磬林端起聲牙戲清溪嗽峯撲
空紫所遇信悠然此生如寄耳志士耻溝瀆征夫念桑梓
攬衣軒楹間歎歌何窮已

田居四首

鷄號四鄰起結束赴中原戒婦預爲黍呼兒隨掩門犁鉏
帶晨景道路更笑喧宿潦濯芒屨野芳簪髻根霽色披窗

靄春空正鮮繁辛夷茂橫阜錦雉嬌空園少壯已雲趨伶
俦尚鴟蹲蟹黃經雨潤野馬從風犇村落次第集隔塍致
寒暄眷言月占好弩力競晨昏

入夏桑柘稠陰陰翳虛落新麥已登場餘蠶猶占箔隆曦
破曾陰霽靄收遠壑雌蜺卧淪漪鮮飈泛藜薄林深鳥更
鳴水漫魚知樂羸老厭煩歎解衣屢盤礴蔭樹濯涼颼起
行遺帶索家婦餉初還丁男耘有託倒筒備青錢鹽茗恐
垂橐明日輸絹租鄰兒入城郭

昔我蒔青秧廉纖屬梅雨及茲欲成穗已復頽星暑遲暮
易昏晨搖落多砧杵村迥少過從客來旋炊黍興發卽杖
藜未嘗先處所褰裳涉淺瀨矯首沒孤羽藁祠土鼓悲野
埭鷗雞舞雉子隨販夫老翁拜巫女辛勤一作難稼穡事惻